

THESIS

DE

MUCOSARUM EXANTHEMATIBUS.



Digitized by the Internet Archive
in 2016

<https://archive.org/details/b22413650>

COMPETITIO AD AGGREGATIONEM

JUSSU REGIS OPTIMI ET EX MANDATO SUMMI GALLICÆ UNIVERSITATIS
MAGISTRI INSTITUTA ANNO 1826.

QUÆSTIO :

Danturne membranarum mucosarum varia Exanthemata causis,
symptomatibus, nec non anatomicis characteribus dignoscenda?

THESIS

*Quam, Deo favente, in saluberrimâ Facultate Medicâ Parisiensi,
præsentibus competitionis judicibus, publicis competitorum
disputationibus subjiciet et dilucidare conabitur,*

THEODORE-LÉGER, D. M. P.

..... Amica veritas.

PARISIIS,

EX TYPOGRAPHIA A. GUYOT.

1826.

REPUBLIQUE FRANÇAISE

LE MINISTRE DE LA JUSTICE

LE GÉNÉRAL DE LA JUSTICE

JUDICES:

DD. ESQUIROL, PRÆSES.

CAYOL.

RECAMIER.

FIZEAU.

FOUQUIER.

ADELON.

JADIOUX.

KERGARDEC.

STILLER

LE MINISTRE DE LA JUSTICE

DOCTORI G. BRESCHET,

FACULTATIS MEDICÆ PARISIENSIS IN RE ANATOMICA PRINCIPI.

Gratissimi nec non amantissimi in eum animi pignus;

DICAT ALUMNUS.

THEODORE-LEGER.

COMPETITORES.

DD. PIORRY.

BENNECH.

VACQUIÉ.

MARTIN SOLON.

GUIBERT.

GIBERT.

BAYLE.

THÉODORE-LÉGER.

BOULLAUD.

DRONSART.

WEST.

TROUSSEAU.

DANSE.

DELMAS.

VALAT.

QUÆSTIO :

*Danturne Membranarum mucosarum varia Exanthemata
câusis, symptomatibus, nec non anatomicis caracte-
ribus dignoscenda ?*

I.

Eruptiones variæ quæ in cute apparent, nempe : *Papulæ, Pustulæ, Tubercula, Vesiculæ, Rubores, Lividines, Ecchymosæ, Petechiæ, Maculæ, etc.*, dicuntur EXANTHEMATA.

II.

Maximæ sunt inter cutem et membranas mucosas similitudines, quapropter ipsas *cutem internam* vel *tegumentum interius* dixerunt plerique recentiores anatomici (*Bichat, Rudolphi, Albert Meckel, Béclard, Blanville, Chaussier, Adelon, etc.*).

Etenim, cutis instar :

- 1° Has invenimus membranas sedem exhalationis et absorptionis;
- 2° Duæ in illis distinguuntur facies, una organis adhærens, altera libera, et attactui objecta corporum quæ *extranea* dici possunt, (*Adelon*) aeris scilicet, et eiborum qui reficiendum corpus intrant, *fecium* et *urinarum* quas corpore ejicimus inutiles jam jamque nocivas;
- 3° *Dermoïdeum* inest et *Epidermoïdeum* corpus; *Dermoïdeum*

nempè, minùs densum quàm in cute, in quo finem habent vasa exhalantia, absorbentia, et nervi papillarem in modum desinentes (*Bichat*), quæ inter distingui possunt, difficiliùs reverà, *chorion*, *corpus papillare*, et *corpus mucosum*, *Epidermoïdeum*, autem, priori superpositum, præsertim apparens in partibus quæis membranæ mucosæ tegumento exteriori junguntur (*Bichat*, *Béclard*);

4^o In propriâ illarum structurâ folliculæ et glandulæ parvulæ apparent, quas *muciparas* nomine dicimus, mucum nimirum, ad lubricandas membranas, fundentes.

Quibusdam denique in animalibus, inter se adeò indiscretâ specie similes evadunt membranæ mucosæ et cutis, ut *Polypus*, exempli gratiâ, aut *Vermis* inverti possint, cute membranæ mucosæ vicem præstante, sine ullo eis vitæ discrimine (*Cuvier*, *Blainville*).

III.

Quæ quùm itâ sint, tantulòque discrepent à cute externâ membranæ mucosæ; cùm prætereà utrinquè reperiuntur et eadem ferè elementa organica, eademque nonnullæ functiones; à priori utrinquè etiam easdem morborum species sæpè sæpiùs prodire facillè jam suspicandum est.

Videamus igitur an, ad liberam mucosarum membranarum faciem, variæ fiant eruptiones eruptionibus affines quæ in cute *Exanthemata* dicuntur.

IV.

Jam dudùm quædam iu membranâ mucosâ oris annotatæ sunt alterationes, in quibus patent *Exanthematum* characteres. Exigua ulcuscula à Græcis *Aphtæ* dicta, ex omni tempore nota fuerunt.

Ait enim Hippocrates : Ἄφθα ἑλκωσις καὶ ἀποστασις ἐπιπολῆς λευκαίνουσα, γλῶτταν, ἢ παρίσθμια, ἢ κίονα, ἢ φάρυγγα πλεονάζει μὲν τοῖς ἐπὶ παιδιῶν (*Onomastic lib. 4, cap. 25*).

Sic et Galenus (*Comment. in laudatum Hippocratis Aphor.* xxiv, lib. 4 et alibi); et Aretæus (lib. 1, cap. 9); et Celsus (lib. 2, cap. 1); et Paulus Oëginata (lib. 1, cap. 10), et alii multi.

Immo et recentiori tempore aliæ tegumenti interni affectiones descriptæ fuerunt, quæ etiam *Exanthemata* dicendæ sunt; memorat nominatim celeberrimus Morgagny se vidisse intestina parvulis tuberculis intus conspersa (*Litt.* xxii, 18), sanguineis maculis distincta (*Litt.* xxxiv, 33), cum Peycri glandulis amplificatis (*Litt.* lxxviii, 12, et lxxxix, 15), etc.

Post hunc anatomico-pathologicæ artis principem, Lieutaud, de intestinis pustulosis multisque gránulorum millibus refertis locutus fuit (*Hist. anat. méd. læsiones abdominis*, lib. 1, p. 87).

Lecat, anno 1763, non semel intestina exploravit tumentibus instructa pustulis, ingurgitatas simulantibus glandulas, et gangræ-nosis (*Rec. d'obs. méd.* par Richard Hautesierck, tom. 1, p. 575).

Doctor Breschet, non minùs ingenii perspicacitate quàm vastà et egregiè digestà pollens eruditione, quùm celebrem professoris Recamier praxim, anno 1806, frequentaret in nosocomio gallico nomine *Hôtel-Dieu*, Enteritidis epidemiam observans, pustulosam et maximè conspicuam annotavit in cadaverum intestinis inflammationem.

Tandem et à doctoribus Prost, in *Médecine éclairée par l'ouverture des corps*; Broussais, in *Histoire des phlegmasies chroniques*; Petit et Serres, in *Traité de la fièvre entéro-mésentérique*; Andral, in inquisitionibus pathologicis canalis digestivi; Rayer, apud *Dictionarium medicinæ*, tom. x, verbo *Gastro-enterite*; Chauffard, in *Essai sur les fièvres prétendues essentielles*; et Hutin, in exquisito de membranâ gastro-intestinali commentario, variæ et vicissim mucosarum membranarum læsiones insignitæ, maximèque cum curâ descriptæ fuerunt.

V.

Omnia verò inter opera quæ nostram illustrare possunt quæstionem nullum prorsus majori juvabit auxilio quàm quod nuper sub titulo *Recherches d'anatomie pathologique sur la membrane muqueuse gastro-intestinale, considérée tant dans l'état sain que dans l'état de maladie*, tantà cum laude in lucem edidit doctor Billard Andegavus. Librum hunc magni ponderis et momenti interrogemus, et varias in eo descriptas alterationes, Exanthematicum plerùmque genus præseferentes, reperiemus.

Describuntur enim coloris varietates morbosæ nempe: *rubores inflammatorii* à ruboribus haud inflammatoriis semper et ritè secreti, nunc *ramiformes* (p. 151), nunc *capilliformes* (p. 159), nunc *punctis minutissimis distincti* (p. 168), nunc *striati* (p. 180), nunc varia per loca *dispersi in* modum macularum plus minùsve extensarum (p. 200); color *nigricans* et *violaceus* cum crassitudine, vel emollitione *textûs mucosi* (p. 547); color *ardosiaceus* nunc uniformis, nunc *strigis*, nunc *punctulis distinctus* (p. 306, 318); color *niger* vel *melanicus* (p. 320); denique *Ecchymosæ* (p. 215), et *Petechiæ* (p. 219).

Mox non jam de colore tantùm aut maculis agitur; intima videtur mucosæ membranæ structura plusve minùsve immutata, gravioresque patent læsiones:

1° In ventriculo parvuli tumores irregulares, confertissimi, molles, sanguinolenti spongiosi (p. 380 et seq.) quos antiùs jam annotaverat professor Broussais (*Hist. des Phlegm. chroniq.*, p. 221—243).

2° In eodem loco fungi, polypi, naturâ varii, nunc adeò laxi et molles ut J. F. Meckel fungis hæmatodibus simillimos eos dixerit (*Manuel d'Anat. gén. et path.*, tom. 3, p. 444), nunc firmiores, rubri quidem, sed nullomodò sanguinolenti (p. 401),

cujus phænomeni ad exemplum, monstravit in academiâ doctor Rullier ventriculum in quo tales octoginta numerabantur alterationes, nucem avellanam amplitudine circiter adæquantes (*Revue médicale française*, tom. 2, p. 148).

3° Processus inflammatorius glandularum Peyerii et Brunnerii, nunc *chronicus*, nunc *acutus*, papulis conspicuus, in quo maximè insignis apparent et natura et sedes Exanthematis et de quo, inferiùs, longior ob hanc causam erit sermo (p. 431, 463).

4° Ulcuscula et ulcera varia non evidenter ad glandularum suprâ dictarum læsionem pertinentia (p. 504, 512), ulcerationes cum granulationibus tuberculosis (p. 488), cum Escharis (p. 513), quas jam descripserat D. Julius Cloquet (*Nouv. Journ. de Méd.*, tom. I^{er}, p. 29, 107), deniquè cum gangrænâ (p. 512).

VI.

Fiunt igitur in tegumento interno, sicut in externo, eruptiones variæ, Exanthematicum genus idem acin cute proferentes, et EXANTHEMATA similiter dicendæ.

VII.

Immò, verbi per extensionem, *Exanthemata* quoque dicuntur morbi in quibus, Exanthematicis eruptionibus cutis afficitur, quales sunt: *Variolæ*, *Varicellæ*, *Morbilli*, *Scarlatina*, *Miliaria*, *Pemphigus*, *Zoster*, *Pestis*, *Scabies*, *Herpes*, etc.; horum nonnullis propria inest forma, propria natura, propriusque incessus et progressus et exitus, ità ut *specifici* fiant morbi, causis, symptomatibus nec non anatomicis characteribus dignoscendi, *Variolæ* scilicet, *Morbilli*, *Scarlatina*, etc.

Admissis nunc *internis Exanthematibus*, videbimusne et in illis, *specificos* morbos causis pariter, symptomatibusque nec non anatomicis characteribus dignoscendos?

VIII.

Jam autem, cutis eruptiones eruptionibus mucosarum collatæ, nos ad id duxerunt ut *interni* tegumenti Exanthemata non secus ac in *externo* admittamus; idem servantes iter et horum morborum causas causas, symptomata symptomatibus, anatomicos characteres characteribus anatomicis semper conferentes, ni fallor ad veritatem usquè perveniamus.

Sed, quò faciliùs pateat an in morbis Exanthematicis mucosarum, phænomena deprehendantur similia, affiniave saltem phænomenis quæ Exanthematicos cutis morbos insigniunt, clarè nunc et apertè delineamus causas, symptomata nec non et anatomicos characteres, maximè conspicua, quorum ope cutis Exanthemata specifica ab aliis morbis, quin etiam et inter se, dignoscantur.

IX.

1° *Causæ*. Nil forsàn annotatu mirabilius est quam causæ efficientis similitudo in omnibus Exanthematibus. Etenim frustrà conantur auctores eam invenire in solâ legum hygienis inobservantiâ, malesanorum scilicet in usu ciborum, in nimio vel vini, vel surexcitantium liquorum potu, immoderatis in voluptatibus, aut contrà, in improbo labore, regionis in situ, aut in anni temporibus, aut intemperie cœli, nunc siccioris, nunc humidioris, nunc frigidioris, nunc calidioris; hæc omnia sicut sexuum varietates et temperamentorum et professionum, consuetudinumve, etc., parvi sunt momenti et ponderis, et remotissimo tantummodo, Exanthematum invasioni favere possunt.

Ætatum tamen differentiæ pluris æstimandæ sunt, et sub hoc aspectu, infantia et pueritia quibusdam præsertim afficiuntur morbis, *Variolis* nempe et *Rubeolâ*, dum ætas provecior *Scarlatinâ* sæpiùs laborat.

Exanthematum vera causa est *infectio* quædam vel *intoxicatio*

cujus principium et natura nos fugiunt; sed eadem semper et cuique propria Exanthemati remanent, ità ut *Variolæ Variolas*, *Scarlatina Scarlatinam*, *Morbilli Morbillos*, etc. perpetuò gignant.

Quæ causa nemini parcet, et in eos insilit qui contrà morbum munitissimi sunt, non secùs ac in eos qui minimè præcavent, vel etiam, causis suprà dictis, inerme latus morbo offerre videntur.

Contendant alii de principii lethalis nomïne; requirant an rectiùs *Miasma*, *Virus*, *Lues*, *Pestis*, etc., dicendum sit. Nos autem, prætermisissis verborum ambagibus et vaniloquiis, quæ rem potiùs obnubilant quàm dilucidant, quùm de penetrandis naturæ arcanis agitur, ea tantummodò quæ directè et apertè ad rem faciunt exponere pergamus.

2° *Symptomata*. Sæpissimè exoritur primùm prævia febris à nonnullis morbi incubatio dicta.

Paulò post, fit eruptio, varia secundùm Exanthematis genus, quæ eisdem plerùmque in partibus apparere incipit, eodem semper modo extenditur, crescit; certum tempus durat, mox minuitur, evanescit.

Factà eruptione, interdùm viget febris, et eò vehementiùs quò complures invadit corporis partes, et pejorem aspectum induit eruptio.

Undè duæ annotantur Exanthematis varietates: *discreti* scilicet vel *benigni*, si fiat eruptio haud gravis; *confluentis* verò vel *maligni*, si gravis facta fuerit eruptio.

Exanthematum indoles plus minusve contagiosa est.

Sporadicè regnant aliquandò, sæpiùs epidemicè.

Singulari tandem eà prærogativà insigniuntur quod nemo plus vice simplici, illis plerùmque laboret.

3° *Characteres anatomici*. Præcipuum certè locum obtinent in dignoscendis inter se Exanthematibus; in *generalibus* dividi possunt et *propriis*.

Generales sunt: cutis tumor, rubor plus minùs conspicui

eruptionis initio, et ad finem morbi sejunctio epidermis quæ, sub specie squamosâ, lapsa cadit è locis affectis.

Proprii autem characteres anatomici de eruptionis genere pendent et ejus evolutione, sede, formâ, dispositione. Ex his omnibus proprium nomen suscipit omne Exanthema.

X.

His positis, ad membranæ mucosæ Exanthemata redeunt, videamus quomodò in eâ proferri soleant, et ea primùm inspiciamus quæ subjectas oculis mucosæ membranæ partes afficiunt.

Inquirentibus, primo loco, apparent *Aphthæ* quæ gallicè dicuntur *Muguet* quùm morbus in infantes sævit.

An autem in eo suprâ dicti characteres reperiantur? An *Aphthæ* specificum sint Exanthema, hoc est causis, symptomatibus nec non anatomicis characteribus dignoscendum?

Ut quæstioni solutionem demus congruentem, singula ex ordine ponderare convenit.

XI.

Qui *Aphtharum* causas invenire, mente non præjudicatis opinionibus obrutâ, studet, eas in occulto quodam et *intoxicante* principio agnoscere demùm cogitur; et verò, si varios percurramus auctores qui de hâc materiâ accuratissimè tractaverunt, insufficientes semper et quandòque etiam falsas morbo eos assignasse causas patebit.

Doctor Sanponts primus, cujus *Tentamen de sodâ infantili* à Regiâ Medicinæ Societate coronatum est, morbi causas cognitu difficillimas ingenuè fatetur, ipsumque semet investigantem diù fefellisse: tamen, in quâdam lactis acrimoniâ eas suspicatur (*Mém. de la Soc. de Méd.*, p. 58).

Auvity doctor privationem præsertim lactis materni incusat; malesanam dein nutricem, æstatis calores, complurium in eodem

dormitorio infantum conventum, etc., etc. Et singulari paulò post contradictione agnoscit se morbum vidisse et in excelsis et puro expositis domibus, quin etiam, apud magnatum ædes, maximis ubi et assiduis circumdati curis, tenelli infantes à morbo immunes evasuri perfacilè creditu foret (*Ibid.*, p. 145).

Corruptioni humorum Van de Wempersse morbi causam assignat et vitiis quæ contrahunt seu ex primarum viarum saburrâ, seu ex hyemis frigidibus, humiditatibus, seu victu noxio, seu sordibus et incuriâ, insalubrive tandem locorum situ (*Ibid.*, p. 195).

Sed Ætiologiam hanc incertam et vacillantem infirmare, haud arduum profectò nobis est. Arguentibus et verò de lactis acrimoniâ, objicere sat est quod *Aphthæ* omni ætate communes sint, quamvis infantes sæpè sæpiùs hoc morbo laborare videantur.

Doctori Van de Wempersse et adhærentibus non difficiliùs respondere est; si sordes et incuriam incusent, in magnatum ædibus sævire morbum testantur doctores Auvity, et Beaude-locque et multi alii; si urbium et nominatim nosocomiorum incolatum, plurima monstrantur rure morbi exempla (Auvity, p. 145); si deniquè æstatis calores, et hyeme quoque non minùs observavisse morbum contendunt doctores Ketlaer et Arneman.

Quid de humorum corruptione? Ex omni tempore omnium morborum causa humores corrupti dicti sunt. Sed hâc in ipsâ hypothese, ut ex corruptis humoribus Exanthema semper idem appareat, idem et corruptionis principium arguere usquè necesse esset, specificam nempe et ignotæ naturæ *intoxicationem* quamdam, cui Exanthematum originem constanter tribuendam diximus.

Ex his colligamus igitur *Aphthas* mucosarum esse Exanthema specificâ dignoscendum causâ.

XII.

Causam quemadmodum eandem esse *Aphthas* et Exanthematibus externis monstravimus, ità et utrinquè eandem esse symptomata.

attento patet scrutatori; etenim ex ordine: febris prævia, tempus iucubationis; specifica eruptio, quæ certum post tempus discedit; secundum gravitatem, morbus nunc *discretus* nunc *confluens* dictus; huic contagiosum meritò ferè omnes medici characterem tribuunt (*Auvity, Sanponts, Kellaer, Van de Wempersse, Arneman*, etc.), et ipse ego multotiès in neonatorum nosocomio observavi, uno tantùm superveniente ægro, complures mox *Aphthis* laborare pusiones; sporadicus incessus; sæpè epidemia.

Symptomatibus igitur *Aphthæ* sunt Exanthema facilè dignoscendum.

XIII.

Anatomici characteres hoc modo patent: per tempus incubationis, jam tumet paulisper admodùm subrubetque oris membrana mucosa; mox autem albicantia quædam puncta linguæ præsertim ad frænum apparent, et, sex horis circiter elapsis, tota lingua, labiæ, gingivæ et pars interna genarum eundem præbent aspectum; veræ brevi fiunt papulæ, quæ nunc albidæ, extensæ, superficiales, rotundæ, spatiumque inter se linquentes, *discretæ* vel *benignæ* dicuntur, nunc autem parvulæ, spissæ, nulloque ferè mediante spatio, *confluentes* et *malignæ* vocantur. Paucos dies attamen papulæ vel vesiculæ pellucidatam servant; paululùm dein subflavescent, exfoliantur in modum pellicularum quæ ad nonum vel decimum diem decidunt, forasque eji-ciuntur; cruptio ad pharyngem extenditur et laryngem et æsophagum, ipsumque aliquoties petiisse ventriculum videtur.

In morbi primordiis, *mili* grano popularum forma assimilata fuit; undè *Aphthis* nomen proprium *miliaris infantium morbi*, à quibusdàm datum est; in exitu autem coagulatum lac satis bellè refert, in varietate præsertim confluenti.

Ex quibus *Aphthas* patet Exanthema esse characteribus anatomicis dignoscendum.

XIV.

Si nobis liceret omnia membranarum mucosarum Exanthemata, ut in *Aplitis*, semper et apertè persequi, expeditè prorsus et eodem modo animadvertere possemus, statim ut appareret eruptio, an eam concomitet, nec ne, causarum et symptomatum series suprà dictis consentanea, nostrumque ità propositum longè facilius evaderet.

Verùm autem aliæ profundo penitus corpore latent mucosarum læsiones; nos omninò effugiunt et eruptionis primordia, et incessus phænomena, et in fausto morbi exitu, cicatrizationis modus; in infausto autem, apertum cadaver plerumque altas læsiones, ruinasque organorum ostendit quæ miserâ artē imbecillitate et impotentiâ arguere tantummodò videntur;

His insuper addatur longa artis anatomico-pathologicæ infantia, et facili fiet intellectu cur tamdiù remanserint ignotæ mucosarum membranarum affectiones; quanquàm nonnulli auctores internis de læsionibus, quas semper morbi aut epiphænomena aut effectus arbitrabantur, jam sunt locuti, eorum observationes plerumque sine discrimine et indigestè relatæ, paululū aut nihil scientiæ profuerunt.

Complurium tandem hodiè virorum præclaris elucubrationibus pathologicæ canalīs digestivi alterationes pernoscuntur; sed, monstrante viam professore Broussais, hūc usquē creditum fuit has omnes ab inflammatione Erythematosa vel Erysipelatosa, nunc acutè nunc chronicè incedenti, partitò aut generaliter diffusā pendere, et eundem semper morbum plus minùsve gravem, nempe *Gastro-enteritidem* efficere.

Quin etiam cutis varia Exanthemata, *Variolas* scilicet, *Scarlatinam*, *Morbillos*, etc., nihil aliud quam *Gastro-enteritidem* esse nonnulli contenderunt, universamque hic morbus Pathologiam jam invasurus videbatur.

XV.

Nos autem, qui, haud immeritò, específicos distinguimus morbos inter Exanthemata cutis, eorumque divisiones stabilimus 1° *Causâ* eandem semper affectionem efficienti; 2° *Symptomatum* serie cuique Exanthemati propriâ; 3° quibusdam *Anatomicis characteribus* peculiaribus eandem semper sedem et incessum servantibus; nos, inquam, quùm res propiùs intuemur, quùm singula singillatim pensamus, de ipsâ membranæ mucosæ canalis digestivi pathologiâ, modo nimis indiscreto dictum fuisse arbitramur; non satis accuratè perspectum fuisse censemus, an, datâ quâdam alteratione peculiari, in eâ conveniat, necne, quædam symptomatum peculiaris series; non visum est an variæ membranarum mucosarum læsiones efficiant, necne, varios et específicos morbos, causis pariter et symptomatibus, non secùs ac characteribus anatomicis dignoscendos.

Cur etenim rectiùs foret unum eundemque morbum in diversis *gastro-intestinalibus*, quàm in diversis *cutaneis* alterationibus semper videre? Cur rectiùs nominandi essent canalis digestivi semper *Gastro-enteritis*, quam tegumenti externi *Dermitis*, omnes morborum processus?

Verùm autem, ut dixit clarissimus Baglivi, *non opinandum, sed clarò et ostensivè sciendum* (Prax. med. lib. 1). Et quànquàm de hâc re, hodiè jam certior factus sum, pro rei gravitate tamen et momento, ipse ego mihi videor *incedere per ignes suppositos cineri doloso*, eodemque cum Baglivi exclamare cogor: *O quam difficile est cognoscere morbos!*

Clarò autem et ostensivè ut veritas patcat, scientiæ historiam, quoad rem nostram pertinet, paucis exponere perutile est.

Ab anno 1811 doctor Bretonneau, qui tantâ cum laude praxi medicæ incumbit in urbe Juliomago, de febris dictis essentialibus multa pensitans et requirens, nonnulla defunctorum his morbis victimarum cadavera aperuit, invenitque nunc granu-

lationes, nunc pustulas, nunc ulcera, secundum morbi tempus quo ægrotantes occubuerant. Ignorans an hæc læsiones forent morbi epiphænomenon vel constans character, hæud segnis fuit arripiendarum occasionum quibus arcerentur tenebræ et mens firmior fieret. Sed in praxi urbanâ raro licet cadavera aperiri; sic longum per tempus parùm procedere potuit, et tamen semper eundem, paucis quanquàm observationibus, comperit eventum. Cùm hæc facta funditus omnes in eo tempore vigentes everterent opiniones, inquieto angebatur animo. Rem statuit sibi penitus explorandam, diligentissimè pertentandam, diuturnisque investigationibus dilucidandam. Aperta fuere animalium cadavera, quò sanus ab insano facilius agnosceretur intestinorum status; et mox certior factus fuit, anatomica glandularum Péyeri et Brunnerii dispositione, dispositionem ipsam morbi singularem et constantem indicari. Tum verò in annis 1817, 1818, 1819 morborum graves epidemiæ in urbe Juliomago sævierunt, præsertim in nosocomio doctoris sapientibus curis tradito. Terribilem hunc morbum omnibus sub formis iterùm atque iterùm vidit, cadavera compluries aperuit diversas per periodos morbi; ab initio ferè usquè ad finem internæ alterationis progressus secutus est, et tandem rei certissimè compos evasit. Amicis doctoribus celeberrimis Beclard, Orfila, Dumeril, et Guersent, rem compertam declaravit et Lutetiæ Parisiorum nosci inceperrunt doctoris Andegavi de *intestino Exanthemate*, ut tunc nominabat, inquisitiones et sententiæ.

Ipse, anno 1820, de morbo locutus est summatim in academiâ medicâ parisiensi; sed rei novitas à communi theoriâ discedentis, mentes aversas parùm percudit. Ex eo tamen tempore quidam perspicaces viri rem annotârunt, inter quos doctores Recamier, Lerminier, et Husson ad studiosam juventutem plus vice simplici, in exercitationibus clinicis, de *interno exanthemate* verba fecerunt. Ipse ego recordor, me nunc artis medendi tironem, in hoc ipso amphitheatro inclytum, atque in-

genuum virum, quem luget perdiùque lugebit scientia, celeberrimum professorem Béclard, audivisse, hoc pariter de morbo loquentem, cùm membranarum mucosarum structuram, naturam ac ruinas oratione tam altâ, tam fulgenti, tam perspicuâ, mirantibus nobis, delinearet!

Attamen, anno 1825, complures ægrotantes huic morbo occubuere in nosocomio, gallicè *Hôtel-Dieu*, et occasionem præbuere novam uni inter nostros præstantissimos judices, doctoris Bretonneau dogmata et assertiones experiendi. Novissimè doctor Trousseau, meus hodiè competitor, tam eloquens quàm doctus, suâ primùm in thesi, dein in mensuali publicatione dictâ *Archives générales de Médecine*, de morbo quem, mutato nomine, *Dothinenteritidem* nunc vocat, magistri sententiam apertè explicavit; hanc quoque, mihi amicus D. Velpeau, clarissimi Bretonneau, haud indignus alumnus illustravit, ut videre est in thesi quam de *Dothinenteritide* hâc in scholâ nuperrimè D. Delange defendit.

XVI.

Qualia sint autem doctoris Bretonneau dogmata et sententiæ de *Dothinenteride* tandem exponamus.

1° Glandulæ Peyeri et Brunnerii duobus modis inflammari possunt; acutè scilicet, et sic exoritur *Dothinenteritis*, et chronicè, quod in phtisicis nominatim invenitur;

2° *Dothinenteritidis* fit invasio sinè causis patentibus. Ipsius origo tribuenda videtur principio cuidam ignoto et occulto quod semel introductum in corpus, glandulas Peyeri semper aggreditur, sicut miasma *Variolarum* videtur cutis folliculas inficere;

3° Morbus eodem modo semper procedit. Nempè apparet primùm motus generalis pathologicus absque glandularum læsione, tempus incubationis nuncupandus;

4° Brevi tempore autem glandulæ tument, fiunt duriusculæ et ad septimum diem omnibus, in partibus quas occupabit erup-

tio, læsæ patent. Eo tempore cannabis semen circiter amplitudine adæquant pustulæ, et crescunt usquè ad nonam diem. Tument et mesenterii gangliones vicinis in partibus eruptionis, et plerumque ova palumbum tunc magnitudine referunt. Ad diem decimum, vel fit morbi solutio et paulatim minuuntur pustulæ, ità ut ad finem tertiæ septimanæ nulla ampliùs vestigia invenirentur si casu quodam improvise à medio tolleretur æger; vel perdurat morbus et alias periodos adimplet. Tunc ad quartum usquè et decimum diem crescere pergunt pustulæ jam tubercula efficientes rubra, conoïdea, quorum in apice exulceratio apparet et ad basim irradians inflammatio. Quod si secetur tuberculum, in medio apparebit quidam borborus (*bourbillon*) qui, paulò post, partibus circumdantibus se jungitur et cadit, relictà altà excavatione, oris inæqualibus et præruptis conspicuâ. Hujus in ulceris imâ parte apparet membrana muscularis et peritonæum ipsum, quæ ibi interdum perforantur, et sic nonnunquam apertis vasis mesaraicis, fiunt hemorrhagiæ formidandæ quæ immeritò nunc *extinctioni* nunc *surexcitationi* virium vitalium attributæ fuerunt. In hoc cardine rerum, rariùs videtur morbi faustus exitus. Sed tamen cum fit ulcerum cicatrissatio ad trigesimum, quadragesimum, aliquandòque remotiorem diem evenit;

5° Cùm pauciores numero apparent pustulæ, ad extremum ileum, quâ parte numerosiores extensioresque sunt glandulæ Peyer, semper inveniuntur;

6° Secundum gravem vel benignum characterem morbi explicantur ex ordine ferè omnia phænomena febribus *essentialibus* dictis attributa. Tamen sequentium symptomatum series signum morbi pathognomonicum dici potest:

Aspectus hebetatus, stupens; oculi ebrïoli, facies non admodum deformata pro morbi gravitate; lingua acuminata, rubra ad apicem et in marginibus, papillis instructa solito grandioribus; sæpè sæpiùs diarrhæa et interdum dolor plus minùsve acutus in abdomine et præsertim ad os ileum dextrum.

Symptomata autem quibus *adynamiam* vel *putritatem* maximè constare dicunt auctores, nempè: lingua fuliginosa, altus stupor, mussitatio, decubitus in dorso, etc., apparent statim ut ulcera, plura minorave numero, intestina invaserunt.

7° Morbus itaque postquàm per universum corpus serpsit, mox in electionis loco residet, undè resurgens æconomiam totam opprimit; sic potest dici primùm generalis, secundò localis, deniquè localis et generalis; quod phænomenon præbent et *Variolæ*;

8° Quàm plurimis factis morbus contagiosus dici potest;

9° Isto præsertim ab anno ætatis decimo usquè ad quadragesimum laborant;

10° Nemo, plus vice simplici, morbo ægrotasse hùc usquè visus est;

11° Sporadicè nonnunquàm, sæpiùs epidemicè regnat;

12° Ex his omnibus demùm, non sequitur glandulas Peyeri et Brunnerii semper exclusoriè inflammatione affici in *Dothinen-teritide*, sed alios posse morbosos processus simul existere et indè complicationes. Non magis sequitur omnes morbos, febres *essentiales* dictos, omnibus in casibus nihil aliud esse quàm *Dothinenteritidem*, sed solummodò in quibus sese explicat symptomatum series morbo propria; quod quidem plerùmque evenit.

XVII.

Quò manifestiùs pateat illarum assertionum inconcussa veritas, necesse est ut firmissimis geminatisque innitantur observationibus.

Duodecim autem maximè probantes inscribuntur in suprà dictâ publicatione *Archives générales de Médecine*, auctore Trousseau (tom. X, p. 169), sunt et septem conspicuæ in thesi doctoris Delange (*de la Dothinenterite*: juin 1826); narrantur et à Billard, tres non minùs insignes (*lib. sup. dic.* p. 426, 432, 433).

Ad eas autem observationes cùm mentem intentam vertimus, numerosissimas à summâ antiquitate omninò similes annotatas

fuisse mox comperitur. Etenim cùm sedulò perleguntur morborum exempla diversis ab auctoribus enarrata præsertimque epidemiæ febrium dictarum vicissim *pudridarum*, *mucosarum*, *biliolarum*, *adynamicarum*, *mucoso-adynamicarum*, *thyphi* nunc mitioris, nunc gravioris, etc.; facîle in eis dignoscimus proprios characteres *Dothineritidi* plus minùsve gravi, quibus interdùm junguntur et alia symptomata aliud organum simul affectum indicantia. Hi et in apertis cadaveribus characteres, magis adhuc conspicuè patent; etsi enim, varias secundùm complicationes variæ nunc horum, nunc illorum organorum læsiones repertæ fuerint, illæ semper quæ nostrum morbum insigniunt omnibus communes perpetuò annotatæ fuerunt.

Non mirandum censeo quod auctores diversos morbos in unâ et semper eâdem affectione viderint. Prorsùs ignorantes morbum à læsione organicâ pendere, nullamque ei in proprio sedem assignantes; ad præcipuum symptoma tantummodò mentem intenderunt; omnem in eo morbum versari crediderunt. Et cùm pro gravitate morbi et quibusdâ circumstantiis, innumerum in modum symptomata varientur, necessariò complures in uno et eodem ab eis annotandi erant morbi.

Reipsâ, nunc viginti vel triginta glandulæ, nunc contrâ omnes simul inflammatione laborant. Quid mirum igitur si in primâ hypothesi sit levis reactio, in secundâ verò vehementissima? Immò, an negandum est ex unâ atque eâdem læsione, in eodem gradu, sed in variis subjectis inter se constitutione non minùs quàm ratione vivendi, et moribus et permultis aliis causis discrepantibus, oriri posse phænomena multifariè diversa? Sic adolescens debilis in quo pollent lymphatica vasa, præstabit horum symptomatum seriem cui nomen *febris mucosæ* dederunt auctores; alius, in quo vigent organa cerebri et spinæ, *ataxiâ* laborare videbitur; hic robustus et valido corpore ferox, *angiotenica* phænomena offeret; ille laboribus improbis et pravâ victûs ratione effectus, mox in *adynamiam* vel *putridinem*

incidet. Ex ipsâ autem causæ violentiâ pendet quoque morbi gravitas; ita ut non semper ex alteratione intestinorum exoriri periculum videatur, sed ex vi propriâ principii, quodcunque sit, quod istam glandulis infert tabem.

Attamen de morbi naturâ, non nulli auctores ad veritatem usquè plus minùsve accesserunt. Sic, Doctores Petit et Serres in descriptione quam dederunt *febris Entero-mesentericæ*, loquuntur de læsionibus *Variolarum* vel *Vaccinæ* pustulas simulantibus (*Itrod.* p. 39), et semper in eodem loco sitis, nempe ad extremum Ileum. (*Ibid.* p. 20). Alteratio ganglionum mesenterii ab illis quoque nota fuit. Sed in læsionibus morbi effectum viderunt, non causam, et nedùm eruptionis modum cognoverint, morbi varietates statuerunt, nempe *simplicem*, *pulpulosam*, *ulcerosamque*, velut inter se discrepantes, quùm eundem semper morbum, ab initio plus minùsve remotum, efficiant.

XVIII.

Jam autem inquirendi tempus est an hoc internum Exanthema, a nobis admissum, causis dignoscendum sit.

Ut *Aphthæ* ætatis prioris videntur proprium Exanthema mucosarum, sic *Dothinenteritis* ætatem proveciorem præsertim attingit.

Si recognoscere laboremus omnia quæ scripta fuère de morbis quos serie symptomatum *Dothinenteritidem* esse dijudicamus, de causis multa vaniloquia videntur dixisse auctores. Iterum enim ab eis incusantur: Idiosyncrasis, incolatus locorum depressorum et humidorum, in magnis urbibus, prava vivendi ratio, tristiores animi motus, mensa luculentior, nimia Venus, pastus carnis putrefactæ, etc. Quantuli sint momenti hæc omnia in gignendis Exanthematibus jam summatim à nobis dictum fuit. Interdùm equidem morbus apparuit lautum post convivium, vel etiam postridiè quàm Bacchus poculis indulgere suaserat. Sed nedùm ea sint morbi meræ causæ, vix invasioni favere compertum est, et sæpiùs morbum exoriri absque ullo errore in ratione vivendi.

Quænam est igitur et cujus naturæ, *Dothinenteritis* causa? Idem, quod jam invocavimus, principium ignotum et specificum. Quod, si negaretur, firmiori modo stabilire possemus. Etenim corpora irritantia animalium ventriculo ingerantur, intestina quocumque modo inflammantur; evenient quidem ex his ulcerationes, gangræna, organorumque ruinæ. Exhaustiat homo omne genus tonicorum, utatur medelâ sur-excitantissimâ, venenum ipsum organis inferat, apparebunt certè *Gastritis*, *Enteritis*, *Duodenitis*, etc., lethalique processu gaster, ipsaque perfossa intestina forsân videbuntur; sed his omnibus nullo modo fiet eruptio et aliæ læsiones *Dothinenteritidi* propriæ.

Est igitur *Dothinenteritis* Exanthema mucosarum specificâ dignoscendum causâ.

XIX.

Longè difficilius quidem est ab aliis secernere morbis *Dothinenteritidem* quam *Aphtas*. Etenim penitus profundo corpore latent eruptiones, propriusque per vitam morbi character oculos fugit. Et sic vidimus hunc morbum, nunc *ataxicum*, nunc *mucosum*, nunc *angiotenicum*, etc.

Attentam mentem tamen nonnulla percellunt. Etenim in aliis affectionibus *ataxicis*, pendentibus læsione cerebri vel cujuscumque alius organi, rarissimè videtur diarrhæa. Pulsus autem semper in extremis versatur vel fortis, vel debilis, vel frequens, vel rarus. Æger nunc levi nunc lethali morbo affici videtur; lingua tandem, sæpius pallida, depressa, humida apparet; interdum mediam ad partem contracta est; nullomodò tument papillæ; magis extensa patet linea rubra quæ in apice et marginibus exstat. Hæc omnia plus minùsve discrepant à symptomatibus quæ assignata fuere ut propria *Dothinenteritidi*, quam itaque ab eis dignoscere fas erit.

In affectionibus dictis *biliosis*, *mucosis*, *adynamicis*, et quæ immunes Exanthemati interno evadunt, sint eæ, nec ne, meræ *Gastro-enteritides*, lingua est quoque nunc depressa et exilis,

nunc patens et crassa. Obductu tegitur nunc flavo, nunc subalbido, et squalenti qui oras ipsas invadit interdum. Non nunquam in se ipsâ convolvitur et undiquè rubet, absque extensione papillarum; si crustâ quâdem tecta latet, ut accidit in omnibus gravioribus phlegmasiis, nonnulla restant tamen *Dothinenteritidis* insignia; tum enim linguæ sua remanet scèrè semper forma acuminata et triangularis; quæ contrà in aliis morbis inæqualiter nunc tumet, nunc deprimitur. In *Dothinenteritide* cum crustâ tegitur lingua, hoc à nono usquè ad quindecimum vel octavum et decimum diem evenit; in apice agnoscitur semper aspectus peculiaris qui *tener* dici potest; in aliis nunc seriùs, nunc ociùs, crusta videtur quæ non nunquam crassior ad margines vel ad apicem quàm ad basim linguæ aspicitur. His insuper si faciei aspectum hebetatum et stupentem, si oculos ebriolos præbeat æger, fiet facilius rei diagnosis.

Quam bellè autem generalia Exanthematum symptomata *Dothinenteritidi* congruant supervacuum existimo pluribus confirmare verbis. Etenim quis non animadvertit et febrem præviam, et divisionem morbi nunc lævis momenti et *discreti* vel *benigni* nomen accipientis, nunc gravioris, quin et gravissimi, sicque confluentem *adynamicam*, *ataxicam*, *putridam* et *malignam* indolem induentis? Quis non annotavit sententias 8, 9, 10, 11 omninò Exanthematicum characterem præstantes? Hæc satis apertè patent ut demùm dicamus:

Dothinenteritis est Exanthema internum quibusdam symptomatibus propriis dignoscendum.

XX.

Nonnulli doctores, aliundè peritissimi, *Dothinenteritidem* nihil aliud esse quàm *Gastro-enteritidem* contendunt; et quamvis concedant in formâ et gradu quasdam differentias, eas tamen annotandas non majoris, quàm graviora inter *Erysipelata* quæ phlyctenas præbent ab aliis distinguenda, existimant.

Sed cùm singula suo ponderantur momento, cùm mens intenditur ad causam specificam singularem, ad morbi incessum et characteres proprios, et præsertim ad formam constantem læsionum internarum, ad sedem semper unam et eandem in quâ apparere solent, ad ea tandem quæ vicinis in læsionum partibus videntur, evanescent fallaces conclusiunculæ.

Verùm enim verò, an meræ formarum differentiæ dicendæ sunt in cute inter *Variolas* et *Erysipelas*? An ex *Erysipelate* anteriori nascuntur *Variolarum* papulæ? Minimè quidem. Disparēs etenim sunt morbi et origine et sede et incessu, et naturâ non secùs ac formâ. Sed cùm his studemus quæ renarrat Billard, in præstanti supradicto opere, cùm intestinorum ruborem Erythemosum vel Erysipelatosum contulimus cum papulis furunculosis quibus insignitur *Dothi-enteritis*, hæc inter se eodem modo discrepantia patent. Etenim, aspectu eruptionis varias secundum morbi periodos mutato, semper in eodem momento eadem patet forma læsionis, et sic organa specifica constat in *Dothi-enteritide* tantummodo inflammatione laborare, sæpissimè absque alteratione partium quæ glandulas cingunt; ita et in *Variolis*, primordia morbi monstrant folliculas tantummodò laborantes. Cur igitur inflammationem Erysipelatosam videremus in morbo intestinorum, cujus omnes characteres anatomici ab anatomicis characteribus meri *Erysipelatis* interni, non minùs discrepant quàm *Erysipelas* externum a *Variolis*? Scio equidem ex inflammatione intestinorum, quam vocaveritis Erythemosam vel Erysipelatosam, nonnunquam ulcera exoriri; sed his in ulceribus nullo agnoscitur modo forma ulcerum quam descripsimus propriam *Dothi-enteritidi*, nec margines præruptæ, nec borborus, nec color, nec vicinarum partium status ferè sanus, etc.

Jam satis autem compertum arbitror *Dothi-enteritidem* esse Exanthema characteribus anatomicis dignoscendum.

XXI.

Duo tantummodò membranarum mucosarum Exanthemata specifica annotavimus; suntne et alia pariter causis, symptomatibus nec non anatomicis characteribus dignoscenda?

In præsentì rerum cardine non ampliùs numeranda esse censeo; sed lustris labentibus fortassè veniet ætas cum plura admittenda erunt.

Jam autem ex his, breviter licet; abundè tamen pro scopo, præmissis, spontè fluit conclusio : Ergò,

DANTUR VARIA MEMBRANARUM MUCOSARUM EXANTHEMATA, CAUSIS, SYMPTOMATIBUS NEC NON ANATOMICIS CHARACTERIBUS DIGNOSCENDA.

FINIS.